

四庫全書

集部

欽定四庫全書

集部
少谷集卷七

詳校官庶吉士臣李如筠

中書臣劉源溥覆勘

總校官知縣臣楊懋珩

校對官編修臣沈清藻

謄錄監生臣施華

欽定四庫全書

少谷集卷七

明 鄭善夫 撰

七言律

亭上

少谷峰頭草亭好，清秋原衍爭繁芬。
石上昌陽盡九節，筍根稚子皆此君。
放言何求了物意，惱世不徹參天文。
平生最愛陶弘景，青山百年怡白雲。

從鳬嶼沿溪陸行抵義江陳職方留讌山中

鳬嶼迤迤連紫臺瀨江曲曲罷喧飀漁人釣艇沿溪泊
野老柴門傍水開樹底巧通仲蔚宅玄中殊愧子雲才
南遊兼得酬佳節黃菊青山共舉杯

寄近夫黃門

憶自吳門再相見風波希闊兩年餘天邊此日歌鳳鳥
海上何時烹鯉魚巢父掉頭終已矣士元展足近何如
秣陵雲樹三千里未得從君賦卜居

九日憶近夫

忽憶齊州殷給事經年不見使人來
往時皂帽真能落
此日黃花何意開
南國眼深鴻鴈字
暮雲天遠鳳凰臺
泰山梁甫輸心地
報汝瑤瑤清夢迴

泰陵

千林松檜鬱相迴
永夜風生瀚海哀
萬國昔曾瞻氣象
五雲空復護崔嵬
古來鳳鳥長難至
天上龍髯定不回
苦憶焚香賜第日
報恩真愧濟時才

放艇

白龍江上放孤艇，青草洲前乘早潮。
觀水欲窮滄海賦，看山虛憶白雲謠。
舟航惡少妨漁父，風雪殘年淨獨苗。
散地生涯轉踈濶，南州人事已蕭條。

金粟臺秋望

鰲峰烏石宛相對，越王城中亦壯哉。
正堪乘興黃花節，況得消憂金粟臺。
斜日遠天寒鴈到，緒風高樹暮蟬哀。
芙蓉冷落秋江淨，故國驚心白髮催。

五日遊道山同宗呂木虛

仲夏五日簫鼓競薛老峰前舟可憐水下九龍江意遠
山迴五虎地維偏故情幸不遺高適豪論能無屈傳玄
萬事糾紛人代裏聊為酩酊答風煙

小至

小至風煙催氣候南州雲物變乾坤城頭梅柳青春早
海上魚龍白浪昏萬事艱難悲故國三年戎馬閉柴門
小山梁苑多才子漢水襄陽猶隱淪

白湖送陳比部

雲山悵望八千里兄弟相看十二年清路音塵長阻絕
白湖風雨重縈牽江梅古調當離思渚鴈春心亂遠天
金馬碧雞思共汝周南蹤跡尚茫然

夢出

少谷先生白玉簪秋風欲別小華陰傍人鷓鴣機初動
驚眼芙蓉花正深未有行藏關世道是何夢卜合人心
東山遠志誰驅使小邨官階自滯淫

溪上即事

二月松花春欲深
九溪石室晝長陰
獨行罔兩還相避
並汎鳬鷺好自尋
人事儻逢圯下履
道情先寄廣陵琴
丹臺玉冊真冥漠
息影忘機漫陸沉

登厚坡鄭氏樓

溪上青楓高十尋
隱君樓閣晝陰陰
未妨磬折隨人事
却為飛花動客心
南靖祲氛征馬困
北山風雨斷猿吟
鼇峰金粟茅堂在
留滯王孫芳草深

汎木蘭

木蘭山下陂水清
南洋北洋風日晴
慣乘舴艋中流穩
頗愛棠梨兩岸明
石塹沙堤廻海勢
鵝鵲鵲鵲亂春聲
漫向雲莊望莆口
更從壺頂看滄瀛

囊山留別黃後峰王藥谷

莆城東畔囊山遠
黃子茅堂碧樹深
千里獨尋雞黍約
九峯同寄水雲心
僧前麋鹿看人慣
春後桺榔委地陰
石壁題詩芳蘚合
虎溪分手暮猿吟

西園讌集座上得移字

烏山秀色平臨水中使園池事事奇斜日亭臺朱夏薄
晚風簫鼓畫船移魚驚舞袖翻深浪鳥訝歌筵出下枝
金谷銅駝那比數幾回吟嘯憶明時

呂縣故城夜泊

井邑蕭疎角正悲河隍猶帶舊城陴大江夜氣繁星動
南國秋風落木遲長路且須防失足他家未肯但鋪糜
櫓檣滿眼公車少回首東山有所思

九日飲延平蕭氏莊

省郎園林秋色深今日何日此登臨
迴溪魚鴈各自適細路藤竹紛交侵
可憐風草四方動不廢瓶罍終日斟
滿插茱萸應佳節時危歲華容易陰

答林貞孚且嘲作西湖東道主用韻

且喜郎君騎苑馬追攀無奈暮途遙
柴門反鎖將疎濶物態相看坐沉寥
萍水幸逢長至月蘭橈漫趁浙江潮
西湖載酒誰能爾斜日空聞吹洞簫

越中

不周風動越王城
天姥峰陰冰雪生
黃道祲氛雙闕暝
滄溟波浪一鷗輕
西巡未返雲臺仗
南顧猶煩瘴海兵
大事安危賴元老
小臣茹草望昇平

會稽寄董太史文玉

太史東歸著錦衣
白魚青笋傍庭闈
十年芸閣春秋定
五月錢塘燕鷁飛
乘興偶過安道宅
憂時未息漢陰機
小舟歲暮將行李
報爾看山到會稽

汎西崦宿光福寺

西崦山前飛白鷗東洙江上春事休已無梅花刺我眼
賴有太湖消客愁獨愛老僧眠水寺為尋芳芷步汀洲
風塵豺虎匝江漢西望長安生隱憂

同夏赤城遊國清寺

侵曉布袍沿澗入黃蒿古殿雨濛濛頓能自拄蒼玉杖
便擬分眠紫極宮二子空筌靈草色五峰芳樹散雲容
春來病骨一杯足未植蓮花煙火中

大風雪投宿赤城盧氏樓

朔雪邊風吹歲昏
赤城今去宿誰村
孤城自照煙霞色
獨夜難招土木魂
短世客星真落落
高樓賓榻亦言言
天涯兒女催歸思
勝子椒花非故園

至日長陵陪祀

長陵西接黃花鎮
白雪蒼巖夜色遙
陰殿衮龍猶在目
往時松柏已干霄
總聞一怒風塵起
想見千官遷次朝
帳極兩京興廢事
小山何意起漁樵

題金司寇芙蓉溪草堂

綿州城東涪江北芙蓉溪水逼高寒人今未向草堂卧
花更何年駟馬看雲錦娟娟臨歲暮白鷗欸欸並風湍
漢庭近事須君子黃髮高歌承露盤

塞上

沙黃草白雲色寒漢主退兵青海灣後命連催羽林騎
前軍飛度玉門關南郊禮樂終難廢北狩旌旗何日還
李牧昔時惟自守暮年牧馬到陰山

南郊改卜陪陳司馬視牲

南苑春風吹暮寒月華光湧紫芝壇上卿劍履中宵出
大祀牛羊隔歲看早報簡書回萬乘竟何齋沐散千官
圜丘想像天威切忝列鴈行夾道觀

不見

年來不見孫明復布褐綸巾何處山長日著書元自得
早時譚劍有餘閒吳門雪水風塵上麟閣雲臺天地間
未返初衣重憶女釣竿何日共潺湲

天寧寺送林德緒赴武當

襄陽使君今欲東優鉢花下行相逢西山爽氣祇自好
秣陵羽書猶未通征伐亂傳車駕出沅湘亦在風塵中
馮良乘馬如可棄傍爾南州桂樹叢

汪希周料兵淮楚

白馬清秋出上京勾陳光照亞夫營中原天子親提劍
南國樓船遠募兵消息祇愁千里草逋逃新恨九江城
漢家歷數元無極吳楚猖狂終自平

曉入左掖

禁城萬木下蕭蕭
海霧陰連金水橋
七廟衣裳還紫氣
九重宮闕自丹霄
喜聞行部風雲陣
轉憶先皇鵷鷺朝
海內何人憂社稷
邇來賢士困漁樵

長安

漁陽上谷古幽州
王業千年易水流
邊騎遠窺青海月
秦城長建白龍旂
總愁關塞生多壘
未道蕭牆隱百憂
日短時艱哀病早
幾回簪笏夢滄洲

冬日遊翠微至香山晚歸更酌湖上

日暮羣山生彩霞草黃湖白見天涯
關河北繞皇輿壯胡隴西連狹道斜
共愛樓臺穿錦樹兼看鳬鷺亂晴沙
南冠未遂滄洲計椰葉鷗羣近釣槎

順門曉直

城上清鐘散御墀曙鴉聲動萬年枝
天迴閣道星辰迥雲捧乾清歲月遲
內省尚承東闕旨從官稀見早朝儀
羈孤愁斷周南目仙仗新傳到具茨

雪中遊報國寺

雪裏經過報國寺，燕京氣候欲冬深。
樓臺近引山河色，風日初含松檜林。
並擬散愁聊出郭，那堪痛飲益沾襟。
南巡輅馬今何處，百萬貔貅行路心。

南宮對雪

南宮雪深朝未稀，冰廳映日還輝輝。
天寒野鳥濕不下，風急靈鶴今何歸。
袁安閉閣自進退，揚雪著書猶是非。
束帶跣屣豈余志，數年朝士俱戎衣。

人日

人日堂階春雪飛齋居閉門生事微仙家栢葉那復有
燕市椒花仍自違久病坐看時序轉倦遊漸覺故人稀
閩山越岫堪攜杖猶向風塵縹緲衣

送徐登州問

爾今出守東牟國余尚依依鵷鷺羣宛洛竟縣高士榻
瑯琊真待子虛文沙門瑤草祗何日海市珠宮空暮雲
只恐飛帆逐仙去蓬萊迢遞不相聞

漫興

龐公擬向鹿門隱
元亮翻為孺子謀
千里青山妨墨綬
幾年滄海弄漁舟
堞樓日斷風沙暮
省樹天迴關塞秋
歲晚朝班終解去
偶耕隨地得巖丘

贈夏公謹

芳洲桂樹好自攀
山人未歸鵷鷺班
天香暗結黃金粟
歲歲飛花霄漢間
煙霞祇弄丘園色
風雨長過龍虎山
草碧淮南定憶汝
雲臺錦石喜人還

南歸過姚氏園

雲霞深護芳樹村門蒼陰連流水源童子青衿應賓客
丈人黃髮對丘園池間鷗鷺回翔好沙上蘼蕪空翠繁
濩落新從栗里去問予松菊舊柴門

上妙高臺

雲海冥冥望不廻鯨波東蹴巨靈開中天樓閣虛無裏
南國風煙江漢來世短動經多事日愁長況上望京臺
白門金鼓維揚卒落日空傳黃竹哀

汎舟遊宜興山水將入張公洞東杭氏兄弟

尋仙直探山水窟脫屣何須書畫船遠岫高雲行落日
平蕪大澤失炎天總聞蔣詡求羊逕未分嵇康服食緣
翠幘平生最浩蕩來遊五嶽頓能便

西湖過孫山人舊隱昔曾與太初用賓月下步六
橋令僧人弄笛嘯歌為和回首往事黯然陳迹矣
荒迷更踏西湖路露舄雲裳空六橋涕淚翻悲竹林宴
笛聲月色傍中宵醉歌亂詫魚龍出此地爭傳麟鳳標

今日孤山最孤寂梅花桂樹頓蕭條

讀太初潯陽歌

青春寄我潯陽曲長路思君鸚鵡洲此日江湖須遠志
浮雲西北有高樓嵇康竟少神仙分尚子仍牽兒女憂
居洛何曾定蹤跡終南渭水入鄉愁

訪遂初宿南高峰下

天末逢秋驚客心只看商意動高林修篁細葉迎風亂
翠栝繁條傍石陰江上釣緝青眼底年來淨葉碧山深

東歸喜有王摩詰輞口柴門許獨尋

登御校場下望故宮

萬峰雲木鬱蒼蒼古壘仍存閱武場南渡關河雙眼盡
中原風物百憂傍尚傳草莽開黃屋想見龍蛇繞御牀
往事只今俱灑淚兩階干羽意何長

勝果寺秋懷

山寺行逢紅槿花江南風物望中賒
棘雲蘿月同秋思鴻鴈鶯鶯亦歲華
多病茂陵仍去國長貧杜曲尚無家

白袍黃帽從吾好歸去滄洲問釣槎

秋夜偕應天尋黃宗賢宿靈巖天柱峰大雷雨作
日落風迴天柱陰峰前雲木正蕭森古堂衾枕秋燈淨
永夜雷霆山雨深漠北不聞麟鳳信海濱空寄蕨薇心
結廬欲擬南陽卧抱膝長歌梁甫吟

鴈宕山中

丹崖側疊窺欲顛拊石捫蘿鳥道迴滄海客心長自遠
錦溪秋色是重來靈湫水激風雲濕昧谷春生鴻鴈回

更上南山望雙閣
葱葱雲氣護蓬萊

謝安石

江左爭傳謝傅風
蕭條猶記辟羅叢
東山第宅遙相問
青海音容迥不同
目斷中原深戰伐
天回淝水失英雄
最憐暴野荒蕪甚
獨望新亭意不窮

九日登釣臺

富春山下嚴陵瀨
九日風光興不違
白石滄波元自好
鳴鷺飛鷺早知歸
南陽文叔求賢遠
相府侯生識面稀

王業帝謨俱莫問百年江海有漁磯

雨後登天遊觀

幽探尚愛天遊觀石磴高盤松栝林鶴馭虹橋今斷絕
黃冠紫屐此登臨千峰雨過玄冥濕列洞雲回元氣深
便欲垂綸釣魚石鸕鷀立滿九溪潯

夜訪建溪歸宗巖宿聽泉閣

葛巾隨地留芳跡翠壁清林把燭行山接幔亭多紫氣
夜來蓬閣動泉聲名都合有滄洲勝冬日還知桂樹榮

白首子真終不改看雲坐石得吾生

贈林中丞

矯矯中丞三輔賢投簪滄海意猶仙高冠大帶回蠻俗
綠醕黃花照暮年勲業不談延慶役兒童唯唱太康篇
紛紛授簡梁園客未道枚生賦獨傳

歲晚入鳳陽山治田

幽棲已傍鳳山遠長日看雲意獨深
溱溱海濤喧永夜冥冥蘿月散青林
田園春近存生事鵬鷃天高寄遠心

避地休歌飯牛曲驚風落木歲方陰

寒食與木虛登芳崩峰遂餞公衡

絕頂天風雲亂飛海門高浪近春衣霸圖王氣東南盡
堯韭秦花天漢稀此地賞心惟汝共萬方愁目欲何依
要知寒食山中意萍葉江湖幾是非

黃明甫憲副欲到湖上

江鳥江花俱眼明乘春驄馬報江行閉門祇分煙霞累
撫世今看意氣橫海上夢回陳子榻天邊樹遠越王城

便須傍竹開三徑拄杖停雲望友生

新營青塾堂未就簡高傳二子

青塾經春營白扉竟須錄事草堂背蕭蕭桂樹鷓鴣急
森森交湖瀉鵲飛絕塞閉門時欲暮小山招隱意應遲
遺榮祇好修奇服蕙帶雲冠上素衣

讀維新錄

日下金雞出絳鑾皇皇天語萬方看喜聞聖主興周道
竟使蒼生起謝安雲捧翠旂含五色草生屈軼指羣姦

早時把志投簪客獨向滄溟把釣竿

後秋興三首

御樓春霧晝漫漫雷壓霆奔霄漢間涕淚翻傷以死諫
風波誰分得生還山中介子終辭爵嶺表唐卿已賜環
北望星河今有象幾回滄海夢朝班

江湖霄漢不相聞獨拊龍泉看斗文燕雀豈知鴻鵠志
鳳麟終遁羽毛羣閉門春事生黃葉去國秋山長白雲
傳語元豐舊遷客好將王道輔明君

龍起襄陵漢水清風掀雲揭動神京一時卿相收者舊
萬國衣冠接聖明戀闕重懷和氏璧防身驚絕楚臣
纓致君堯舜羣公在短褐長鑱意自平

卜居懷林待用司空

卜居為愛龍山好薜荔陰連湖上村海日帆檣動書牖
天風鵝鸛到柴門清時定許潛夫遠散地還知靜者尊
聞道平生謝太傅東山卧席未教溫

秋日湖上懷舊游

湖上羣花開未休
茅堂夏結湖水頭
青天舉目鴻鴈至
白日閉閣琴書幽
正愁鵝鴨惱隣舍
不見親朋經某丘
滄江遲暮好自去
斷雲弄泉銷百憂

青堊堂石傍植菊花冬日盛開

青堊堂西湖石畔
厓菊花繁明暮年
乾坤正色黃如此
丘壑孤懷爾最賢
祇許茵芝同遠地
不爭桃李媚陽天
上林冰雪愁無賴
三逕時開向日邊

葉六罷戍潮陽歸話湖上

爾戍潮陽相見面經年別我草堂遊瓦盆碁局青林在
菊蕊鷗羣舊國秋莫倚口談三尺劍要知身是一虛舟
芙蓉薜荔山人服隨地相携意氣投

野興

龍首橋南湖水北幽居細擬輞川中青霞返照流孤榻
白鳥卑棲並一叢弄筏取鮐隨稚子接觴爭席任隣翁
年來混迹漁樵下賸有銅鞮伯氏風

聞執之侍御赴闕追送不及

名巖擬共花時見渺渺芝田空復情繡斧春當霄漢立
彩帆今傍斗牛行南州煙水還徐穉京洛風雲逐馬卿
日暮滄江相失後可無獻納慰平生

答黃應期太常

聞君未罷滄溟釣余復歸耕綿上田江東落日淹多夢
燕市殘盃空昔賢悵別喜承縣榻問離羣那寄卜居篇
越城西望無千里乘興還廻何處船

答方思道

菖蒲龕下東林宴當日招携意未疎
羨汝能騎隴雪馬
嗟余真釣武溪魚
藥欄芝榻三年別
薊野邢陽萬里書
重沐清辭報叢竹
茂陵端遣臥相如

林樗翁舍余草堂以詩見貽病不能候次韻作答
鰲頂峰迴雲霧光
少微來照浣花堂
十年城府新相避
三逕松筠故自荒
問道向迷襄野北
移家今在漢陰傍
方山耆舊偏憐我
只道相如病更狂

釣臺用孟浩然韻

釣臺東接峽江流臺上平臨歐冶州豪客乘風時有賦
海翁無事自忘憂中原目斷冥鴻路落日愁生芳杜洲
歲晚煙波浩無極鷓鴣鵲鵲傍人遊

秋日病懷

南州木落歲蕭蕭薊野風煙萬里遙病後客心惟藥物
秋來人意滿雲霄平沙鴈帶三湘雨橫浦帆歸八月潮
搖落應悲楚公子不將舊業付漁樵

登臺

江草幽幽江燕回感時頻上望燕臺天高西北神京在
鴈落東南朔氣來豹谷水田聊自給龍陽橘樹未應栽
君王近著唐堯德巖壑全生是櫟材

送歐陽崇道入覲

年來苦閱循良傳別路看君意轉長颯颯秋風吹岳水
娟娟菊蕊傍重陽中原目盡鳳麟出南國車前烏鵲翔
莫學武原陳仲舉只將懸榻報君王

九日登高益山憶舊遊

此日經過高蓋下忽憶去年高蓋峰祇見黃花似往日
那堪衰髮向秋風煙霞不斷重陽路勲業猶疑三逕松
舊國蕭條歲復晏布袍芒屨意何窮

歲暮懷戴郭二蘇州

經年不寄吳都賦文藻風流孰女如作客總飛青玉鳥
埋名翻受錦囊書中原風物回秋夢東海龜龍款使車
儻及桐江舊釣侶明時甘守越溪魚

李忠定祠

千秋祠廟對樵溪丞相愁時日向西江漢已浮龍馬去
風塵遺恨鷓鴣啼傷心北狩誰相問極目中原他自迷
三疏留君見東澈人情天運苦難齊

次夕峴江聞笛贈林德敷熙載父子

峴水橋西秋欲社追尋仍泛月邊船短簫長笛悲相語
錦樹滄江絕可憐交遊自識茅容早子壻誰當黃幹賢
此夜星河未堪別眼中閩楚各風煙

秋日偕諸子遊鰲峰

卷七
鰲峰天畔登臨去，雲木新開平遠臺。落日山城生海氣，
中原風物送秋哀。一時賢士俱傾蓋，滿地萍踪笑舉杯。
梁國鄒枚豈吾事，竹林嵇阮是仙才。

木蘭陂謁李長者祠

木蘭山下誰作陂，將軍灘頭功已虧。滄海未銷錢女恨，
路人惟誦李侯碑。秋深極浦生寒水，神至靈風滿素旗。
江漢湯湯吾力薄，祠前立馬意應遲。

贈汪希周太守

憶並先朝戊己年雪堂文酒日睥睨燕關舊侶嗟誰在
閩海浮槎羨女賢鄉信風煙連楚粵宦情冠劍動山川
郡齋今復虛懸榻何地看雲更黯然

赴白下黃田道中作

稍喜移官向白門春湖間接瀟陵園經旬肺病形容變
千里鄉愁夢寐繁耿耿星河涵遠水冥冥氛祲散中原
廿年漢署成何事翻向青山斷客龜

建州逢蔡霞山

黿頂歌鐘東郭宴舊盟回望主思何窮音塵豈說三秋隔
髮髮知堪幾度逢滿地江湖催汎梗極天雲霧滯冥鴻
休論十六年前事愁絕關河涕淚中

冬日飲陶園

細霧濛濛千竹林名園錦樹歲將陰主人愛客車馬過
竟日聞歌尊俎深幾朵菊花猶掩映一羣鸕鶿故浮沉
登臺忽聽鳴臯鶴九萬雲天識女心

憂

擬將新句詠銷憂詠罷重增雙涕流柱下朱郎成永別
江東黃尉竟何求青袍事業悲三試畫省風煙感四休
搖落江山客途裏石門修竹夢林丘

臥病

臥病困頓安足悲武夷秀峰虛翠微閉門伏枕費日月
問醫尋方多是非羈孤賴有任安好薦拔恐為山公違
形容變化已如此荷衣草榻吾去歸

元日平安道中

元日誰家藍尾香客身多病更殊方每看兒女暫相慰
不見梅花頻欲狂揚州舉目風景別平安發舟冰雪妨
春光羞澁可腸斷况乃兵亂賸悲涼

書望

陟彼阿丘望欲迷美人何處不勝悲舟中日月忽寒暑
道上音塵但鼓輦揚水湜湜聊濯足終風獵獵故吹絺
行藏未定憑誰卜力盡蒼茫有所思

懷金山文殊用前人韻

金山蘭若昔曾遊尚記松針滿地秋
竟日馬蹄山雨駐
一時詩句野僧求行藏笑我逃三昧
詞翰真誰僭上流
傳語遠公須結社王郎無復夢刀州

秋夜

七月欲盡天氣清殘月未上江猶明
流螢渡水不一點
玄蟬咽秋無數聲獨客尚未送貧賤
四方况是多甲兵
立罷西風夜無寐吳歎嫋嫋感人情

送太白山人觀海

長江天風吹歲暮送子東去浮滄瀛三韓波濤光怪出
孤山松檜蛟龍鳴區中馬背豈心事鳬鵲鶴瓢非世情
明年期我坐日觀若木照地春相迎

過方山人隱居

金華山下空結菴金華山人愛終南未聞造父得朝十
却道狙公能莫三子苦揮塵上素服爾何秣馬向黃龕
曲轅散木願自保漫為犧樽悲杞楠

九日與倪宗正祝鳴和登觀星臺

秋盡繁陰苦不開散愁無計一登臺日邊閭闔紅雲動
塞上風沙白鳥來秦分正當秋氣盛鴈門未見玉音回
百年與爾同羈旅九日同歌黃竹哀

答祝鳴和

一落滄洲懶性便苦吟何有八哀篇美芹但取隣人笑
小草猶慙官長憐白日嘯歌聊自慰赤霄勲業尚茫然
攜琴載酒忘憂得不愛牀頭三日錢

壽日成禮奉天門

初日鴉啼宮樹林奉天高殿氣駸駸衣冠况值千秋節
犬馬真懸萬國心白羽書來兵未解黃河水落歲將陰
龍旂鳳輦關山道邊事辛勤風雪深

歲晚

鴈去陰山白草生六邊風急翠華行玄冥天外連霜雪
上谷年來厭甲兵萬古風雲終不減三吳財賦已無征
漢家未罷輪臺役歲晚迢迢江海情

彭城避地

朔水蘄門誰問津
洪河波浪眼中新
孤舟此夜山城雨
短劍長年驛路塵
鄭老有官無飽飯
杜陵多難每依人
飛書近報齊梁破
何地江湖托此身

夏朝同顧九和侍講湛次泉編修應元忠吉士汎
舟出西崦遊太湖

西崦山前逢首夏
與君一笑共扁舟
已無梅花爛刺眼
賴有太湖清散愁
晴日菰蒲鶯鶻下
遠風波浪魚龍遊
酒酣忽憶鴟夷子
長日挂帆天漢流

寇至

白日淮陽飛羽書
浪翻鯨駭振江湖
六飛聲斷天狼穴
七郡功虧銅虎符
即見縣金募丁壯
更聞空國補軍輸
君王不利封侯印
祇事江南未獻俘

病起送方思道

問君何日棲武夷
送君出門雙淚垂
三春伏枕自氣候
一朝出郭空華滋
知他濁酒有誰共
析此垂楊不自持
許墅關頭聽人語
盜賊滿地將何之

吳閶

萬木蕭蕭河漢秋
吳閶斜日獨登樓
眼中未忝茅茨怨
海上風塵笳鼓愁
一命未忘青瑣闥
幾時還問白蘋洲
燕然銅柱男兒事
謾倚青萍看斗牛

秋興

梳頭出門秋滿溪
蓼花無數明太堤
堤邊桔槔獨婦女
海上羽箭多男兒
中原已失尚方劍
南國全看飛將旗
青草沙頭有消息
天未悔禍人焉為

狼山聞捷

龍驤百萬向南征
水陣堂堂赤幟橫
旋報狼山歌小海
喜看元帥是書生
連年江漢傷多事
此日朝廷念太平
漢戍秦疆俱鄙陋
須將四海作長城

至日

白日冉冉復南至
闔閭城西客未歸
山中桂樹歲月晚
石上梅蕊園池非
白鳧雨雪為誰急
黃鸝天風終自飛
安得垂衣歌帝力
坐分滄海釣魚磯

送太初觀海

天風颭颭吹歲暮
汝今復欲東南征
太江波浪蛟出舞
滄洲歲月芝長生
水經地紀足勝事
鳬舄鷺瓢非世情
洪河雪後會相憶
我在蓮花峰頂行

十三夜玩月

粵南秋色復欲暮
城東閉門歲載陰
清霜上鬢豈春事
明月在天關
客心水昏魚龍已
浩蕩木落桑梓亦
蕭森
杜老中年更愁思
猿啼來往已淪深

天末逢故人

不耐秋風搖落後與君把袂看飛蓬關山無地干戈息
江海何年笑語同歲晏柳條那忍折天涯車轍尚難通
蕭條更問桑乾路目斷園陵煙霧中

聞孫山人在西湖水寺

吳門往日聽談玄塞鴈江魚動隔年間爾獨居水西寺
與誰同泛六橋船魚翻荇帶錦不亂鳥下蘼蕪青可憐
擬把郢筒共梅蕊兼程定得小春天

歲晏懷近夫

不見殷郎又一年，每憑鼃夢到青田。
成家文學人皆仰，為邑風流世共傳。
嵇呂豈辭千里駕，桃哀真結此生緣。
孤山雲物負殘臘，鴈宕煙霞愁遠天。

白下訪方山人

山人不是方外客，十載江湖桑梓悲。
豈為飢寒歷辛苦，坐教詞藻歛瑰奇。
南征却道如司馬，老去終傷失惠施。
白下風煙得見否，憶君長誦考槃詩。

孤山寄太白山人

為問山人孫太初，交情歲晚莫教疎。
孤山梅萼春相惱，滿地松苓日自鋤。
江夏肯容禰處士，茂陵初臥馬相如。
知君不廢苔溪釣，書帛能無寄鯉魚。

天竺

旬有五日不出戶，闌風伏雨寒蕭蕭。
偶爾尋僧入三竺，多方索梅窮六橋。
黃精紫蕨亦自飽，瑤草璫花還見招。
旌旄滿山江浪惡，腐儒解組為漁樵。

歲暮入江郎山訪周山人

江郎三峰開畫屏上有朗朗處士星
修淵將到壺丘子憤世却續南華經
松間相信鶴一隻洞口長生芝數莖
釣渭耕巖不違志乘桴余亦下滄溟

人日

病起獨吟溪上樓煙波雲木共悠悠
細斟栢葉酬人日漫嗅梅花憶隴頭
天遠美人長在望路危春色未銷憂
南行故國柴門迥擬把綸竿伴白鷗

八月二日

曲巷疎籬小院幽
荒村獨夜竹桐秋
星河正值銷魂地
鴻鴈還過何處樓
臥病豈堪聞木葉
息機猶自着羊裘
碧霄萬里風雲氣
起凭危闌歌四愁

得思道書

伏枕忽傳車馬使
攬衣迎問已沾巾
開緘蕭颯見汝面
回首蒼茫任此身
司馬著書長抱病
黔婁為道不辭貧
滄江冷落梅花晚
獨抱遺芳向遠人

答近夫思道

憶昔三吳共臨眺上山不用杖藜扶只今臥病難行立
聞爾加飧定有無千里音塵雙涕淚萬方憂患獨泥塗
蠻煙朔雪催人事愁對城南鶯鴨湖

登道場絕頂用太初韻

峰頭獨立雲霧飛天畔風迴蒼玉扉深林日落豺虎伏
橫江浪高舟楫稀舉目中原望不極側身滄海愁依依
峴山雲水秋意動故園幽事行當歸

秋興七首

閭闔風吹庭樹柯乾坤西北尚提戈
舊京芳草秋猶積絕塞浮雲今柰何
不耐隱憂侵白髮竟將吾道付滄波
碧雞金馬非前日獨倚江樓聽棹歌

湖上清霜淨柳條南天九月氣蕭蕭
歲寒蘭芷將無變日暮豺狼迫自驕
三輔尚淹王景略北庭終數霍嫖姚
風煙着處堪踈濶白水青山每見招

且喜鎮兵收楚蜀十年戰伐可勝情
誰家寡婦哀初散

萬國秋笳咽未平祗見帝恩優赤縣稀聞官府念蒼生
請看咫尺輪臺詔今日蠲除征又征

釣臺南畔萬家墩昔日豪華天下聞石首槎頭爭水陸
綺衣朱袖照乾坤年荒禮樂今何有日短麕豪空復存
破帽蕭蕭江海客側身玩世欲忘言

強隣牧馬下陰山西塞諸軍永不還萬里角聲悲歲暮
三邊烽火直函關浸淫已入襟喉裏桴鼓深防霄漢間
聞道山門屢推轂總戎何日斬樓蘭

黃河南岸消息微
甘肅寧夏邊人非
清秋古戍軍需關
白日西山餉道違
警急大庭修馬政
承平裨將玩兵機
願將干羽收金革
莫令漁樵著鐵衣

南州臥病聊卒歲
東山草堂難去歸
行年三十鬢已改
有懷突兀時多違
白湖鷺鷥風波亂
畫省冠袍日月非
人事天機更消息
狂歌清淚滿荷衣

登無諸城南樓

越王城東江欲濤
越王城上烏山高
亢龍愁雨久在野

病鶻憐風空解絲西望佳人息環珮南來樂土避弓刀
園葵一飽那可得今日登樓心獨勞

歲晏答王時行

越王臺下草堂陰萬壽橋東流水心天畔風雲新歲晏
霜前梅柳故園深黃巾亂後只茅屋白社歸來無橘林
搖落最憐王水部近時生理戴朝簪

病起步西禪

一春伏枕鶯可憐病起野池明白蓮偶爾梳頭出城郭

便應看竹到西禪天晴求食鳥雙下日午閉門僧獨眠
明發螺江有行役紅塵白鴈異風煙

亭子

遲清亭子對群峯地迥能招萬里風八月商聲疏病葉
滿城暝色起寒蛩身孤舊國翻成客世短長年是惱公
擬把哀容向山月嬋娟猶在亂雲中

白鶴嶺

白鶴嶺頭春惱人暖風吹落小烏巾紅英照眼相與媚

碧草會心難重陳
稍喜小樓臨海岸
擬乘輕艫上河津
石梁南去煙波濶
渤澥何時起釣綸

鰲嶺

鰲嶺飄飄理巾舄
天風北來吹鬢毛
土花石黛自成錦
松枝海水相為濤
空門閉雲春寂寞
山鬼嘯月夜蕭騷
清齋白飯正着我
蒲團坐嘯求吾曹

送陳國英侍御還蒲兼懷素翁

歲晚長途未息機
羨君巾舄已南歸
斷鴻江海看仍遠

短鬢風塵覺漸稀
肺病竟須金鼎藥
時難真想芰荷衣
木蘭陂水深
魴鯉欲傍雲翁舊釣磯

大湖汎舟登弁頂

湖上菰蒲秋映空
絳樓紺殿俯龍宮
鐘聲下接馮夷鼓
木葉深回罔象風
吹笛擬從蓬海去
揚舲疑與漢陂同
渚荇沙鷺太無賴
我愛南山芳桂叢

秋日南屏山中

清秋草閣同杯酒
步履看山幽思多
雨外暝煙留不散

江間飛鷺靜相過
殊方交友情偏厚
頻歲憂時鬢已皤
白幘歸來還自慰
雲臺石室定如何

三月晦陪顧未齊侍講湛甘泉編修應元忠吉士
遊太湖龍塘舟中

龍塘瀟瀟近太湖
湖上之水明菰蒲
雨餘鷗鷺清湍淨
日晏牛羊滿地鋪
每羨鱸尊憶張翰
未因鰕菜學陶朱
兵戈愁疾侵尋久
擬此卜築寧吾軀

九月劉蘇州携酒過寄寄堂席上作

今辰何辰我對酒爛醉却為劉蘇州佳有佳樂見君意
美境美人忘我憂百年清話肺腑露三江長望風烟流
出門高下遠天淚去燕來鴻何所求

暮春遊望

陽山西陂野水肥東風冉冉吹芳菲越姬蕩舟入遠浦
吳儂荷鋤談落暉茅屋桃花亂點點樹枝黃鳥亂飛飛
蘇州病客憐汝切明朝杖藜春事違

寇至二首

延陵昨夜飛羽書吳人今日盡移居江陰室廬半成燼
京口士卒多為魚不知貌虎為誰用只恐豺狼乘我虛
向者山東只數騎將軍何事更趙趙

其二

山東羣盜睨東吳吳下倉皇急遠圖但見懸金募丁壯
不知賣屋補軍輸屢聞天上新頒爵猶有江南未獻俘
昨夜中庭弧矢沒自憐病骨轉成癯

答近夫九日見寄

殷郎懷抱向誰開我亦迢迢江上臺塞鴈未逢還步月
離花縱好嬾持杯龍山落日惟黃土虎阜西風漫綠苔
一覽黑貂驚歲晚暝傳霜下夜砧哀

九日對酒不登高

今年九日長洲苑忽憶去年西楚鄉連山烽火不改色
揮淚故人天茫茫且須舉盞媚芳菊豈敢登高望遠方
此日明年復何處可堪廻轉杜陵腸

喜得家書

無數羈愁此夜窮
各天相慰重題封
中原氛祲三千丈
故國煙霞百萬重
伏枕未容蝴蝶夢
加餐合紀鯉魚功
幽燕十月風霜惡
季子貂裘不受縫

至日馬上

白日冉冉復南至
闔閭城西客未歸
觀臺雲物舊色相
靈源芸荔新芳菲
淒淒風雪我乘馬
渺渺烟霞他采薇
亦欲掉頭東指海
芙蓉三載未成衣

溪上

南岸村邊好放船
早春風日淨涓涓
涓風吹錦水文
見日射金沙色相鮮
匝匝碧山圍矮屋
輕輕白鷺掠晴川
細詢民瘼非前度
猶喜溪光似昔年

駕出北平

桑乾西路帶楊河
萬乘三秋躍馬過
雷澤釣絲天上應
瑤池雲氣暮來多
茫茫禹貢真不有
款款祈招亦奈何
幕下少年俱貴達
袖中長鋏謾悲歌

早發臨安

玄陰早發臨安縣遠道真尋何處山一夜雨聲驚木葉
幾年雲氣望函關赤雲近在風塵外黃鵠高飛霄漢間
聞道襄城迷七聖中原回首淚潺湲

二月晦日發潯沱

二月晦日暄氣寒潯沱水深舟楫難已携家室情復惡
況憶兄弟鼻俱酸白鴈一雙杳然去黃鵠數年離哉翻
幽并氛祲只昨日客子胸臆何時寬

夏夜仲鵑過草堂

炎天鬱鬱氣若焚都城兩月不出門
豈無故人少惠愛祇有吾子來頻繁
野老開心出文字拙妻作意蒸雞豚
雷陳風流世所羨與爾結契為弟兄

贈高二宗呂

早向滄江去不疑
簾豪翻笑銳頭兒
襴衡材大公卿妬
原憲家貧九百辭
顛倒衣冠成古制
招呼風雪有新詩
鰲峰石室藤蘿外
欲採瑤花報汝知

朱蕩南太守遣杯茗過鴈山奉酬

蕩南杯榼走重盃正我看雲初出關車馬忽傳青鳥信
風煙一竹白龍山聞知湖口舟長借每到花時釣未還
萬事忘機猶汨沒羨君安穩弄潺湲

同雷克全丁文範董文玉西湖泛舟遂歷湖上諸
山

天畔雲煙清不了仲春風日淨巾袍春坊能事稱杯掌
刺史風流擁節旌青柳歲時臨澤國白鷗早晚到江臯
西湖野意元相識拄杖中流興自豪

西湖同李水部孟玉詹進士津

春城萬水散晴湖
南北高峰相對孤
雨後舟航分氣象
年來心跡落虛無
只妨魚鳥催人事
不厭菩提混世途
小折梅花携二子
竟無秀句弔林逋

中秋京華玩月

上谷諸城紫氣通
輝輝星月自離宮
關山萬馬黃陀北
殿闕三秋白露中
大將此時須縛虎
侍臣何地合從龍
繩樞甕牖長消息
愁絕京華鼓角風

送惟可還三衢

昔年相逢胥水秋今日重在閩山陬中間喪亂真憐汝
南鄙音塵不散憂別後山陽頻弄笛花時荆楚一登樓
旄頭尚直天西北何地巾車各自由

昔余北征太初至自湖州送余至姑胥吾惟可至
自三衢送余至檣李不二載間相繼下世重逢此
地愴然傷懷作哭二子詩

憶從把抱三吳志念爾攀翻遠道來此後音塵一哭耳

舊時風雨竟何哉江山祗掛南州劍天地空生諸葛才
橋李姑胥是永別暮雲隣遂動秋哀

李中丞邀遊南高峰與棠陵子同賦

南峰東下對扶桑海霧天風引望長此日登臨成勝會
眼中文物傍重陽避人鶴鶴遙相過近郭棕篁好自蒼
笑把荷衣接旁服狂夫談討只滄浪

夏朝覃山卽事二首

湖水淼淼橫釣舟湖邊人家生事幽胡麻塞畦衆作動

桑柘滿地春蚕收
卑枝不肯受冠蓋
短草何妨彌阻修
吳儂禮數亦自好
方巾野衣迎道周

其二

四月覃山茶樹香
蹋歌採茶多女郎
孤亭小池長杜若
斜川細雨飛鴛鴦
島嶼歷歷渺雲水
煙波茫茫連大荒
眼中春花復欲盡
未得及春歸故鄉

答樗翁見懷次韻

上日南湖春草餘
飛槭報我茂陵居
祗益停雲承笑語

還聞抱朴入空虛苦遭瘧鬼時相泥愁見鷗羣晚自如
世短途難身獨遠京華新訂絕交書

莆諸君子邀遊木蘭宿雲莊溪閣因餞余涌江把
袂而別悵然興懷

莆陽名士太古流愛余來並木蘭舟詩書禮樂話未了
琴瑟笙簧歌少休三秋問俗風塵切一路看山花鳥愁
此別應知各努力思君無那海東頭

七言排律

九日同劍川諸子登馬坑諸山望九峰道南祠記
事

南平縣北重陽至強起登高風雨朝烏帽黃花修舊事
風流人物憶前朝東南形勝山川固閩粵衣冠氣象饒
千樹早霜寒自積一潭秋水澹相搖漢王俎豆還宮廟
劉守勛名已寂寥羣盜檄書隨處滿萬方兵甲幾時銷
年荒白晝三軍譟日遠黃堂五馬驕病後故人俱杳莫
韋然勝事不蕭條人兼鄴下何須避詎重淮南定見招

青眼豈辭鸚鵡蓋白袍更上木蘭橈四賢道近源流斷
雙劍龍潛歲月遙桂樹叢生江草長不妨志士遁漁樵



少谷集卷七

欽定四庫全書

集部
少谷集卷十

詳校官庶吉士_臣李如筠

中書_臣劉源溥覆勘

總校官知縣_臣楊懋珩

校對官編修_臣沈清藻

謄錄監生_臣施華

欽定四庫全書

少谷集卷八

明 鄭善夫 撰

五言絕句

宋宮故基

西門數頃地舊是帝王宮
莫謾歌禾黍山河涕淚中

病居讀顧與新詩

伏枕殊方客秋風歲載陰
頭風頓覺愈吾只愛陳琳

楚客

楚客望不返行坐楚天心荆門未可涉洞庭波正深

冬青樹

道傍冬青樹人好樹亦好豈不纏風雷青青自持保

子夜變歌三章

洪江通海潮朝往復暮來出水下洪江何時逐潮回

我欲渡螺江螺女不可遇人知子夜來不知子夜去

漢王昔垂釣白龍從天來至今龍起處猶傍漢王臺

東園

汶口園仍好商於草已無誰歌採芝曲高調滿江湖

柴門二首

涼月光不了照我芳桂叢白鳧如人長來往柴門東
家住白湖陽習見風波事荅荻何蒼蒼亂我蘭與芷

題畫

商意變綠荷秋風落江渚零露忽泥人愁聞鵲鵲語

吳中雜詩二首

秋浦下鴻鴈秋風鳴菱荷客懷一萬里江月夜如何
烏衣不復見蟋蟀聲近牀黃花深幾許昨夜一籬霜

江行五首

冰合如鏡平冰斷如雷鳴孤舟不得寐枕上悲風生
厭見雪如麻不見梅放花江北是客路江南是客家
閉門對孤燈開門見明星默默心底事礪礪誰能平
宦海多白波客路多黃塵波白解覆舟塵黃解污人
少年愛春日羯鼓開春盤一自不家食春盤歲歲閒

漫吟三首

浣紗傷妾貌折花傷妾心郎君不相棄請聽白頭吟
白頭人所賤綠髮人須戀君如戀綠髮莫到白頭變
愛君如愛天事君期盡年妾意無虛假君看塘上篇

古意

誰家玉面女素足立水傍睠言新歲近作意浣衣裳

無題三首

悄悄風色寒白地不敢看天尾是故國天頭是長安

嘆息復嘆息淚沾頭上巾青萍將底用光掩屬車塵
明月豈長好的的入我懷東風不愛情浮雲與意乖

漁者

白日下廣川煙濤去不還平生釣魚意入手便忘筌

虹橋

虹橋不可渡東斷蓬山陽只有賓雲曲流音下大荒

韶州吟二首

聞渡韶陽水滄溟水更深
娜媧時入饌莫作百蠻音

蠻溪楓葉下蠻女答歌還太平無外患何事百牢關

閉門四首

閉門打坐坐鵲噪庭下槐種竹成琅玕天風颯然來
曉起披雲氣攤書青澗阿六經無一字祇道配江河
讀易苦解事閱世涕橫臆如何中天日未見羣陰息
算彼南陽盧瀟灑玩世事平生梁甫篇吟對滄浪水

畫六絕

皎皎水上仙風吹入我懷我夢逢姹女洛波墮弓鞋

邊人競北風牧馬陰山陽腰間寶刀赤河清爾來王
頭陀戲海蟾手握庵摩果大觀天地間一咲吾喪我
鸛鵲乘天巧幽篁學語繁江南氣候正莫過魯東門
賣藥行市南隱身入壺中指揮費長房白日騎黃龍
六拍按六氣廣樂音未希舉手謝世人行歌綠雲歸
病中吟六絕

掩書臥玄冥蟋蟀在床頭如何閉關月耳畔鳴不休
形骸久為累三尸今晏然安得魯仲尼展轉鑄顏淵

虞卿為著書卒歲坐窮愁那知交字外翻有逍遙遊
有身終是盡學死始長生吾將鍊真性去去凌紫清
愛河易漂溺三山波浪翻覓心了無得吾今閉吾關
詩書破我拙聰明多事起那復黠聰明返我混沌子

伏嘆五首

少年逐鉛槧學道苦不早眼看春田花誰是長久好
密雲不成霖西郊氣烘烘女其蛟與龍胡為處池中
窮年守庚申服食意未已如何三尸蟲猶在腹心裏

生亦何所喜死亦何所悲言脫生死關短脩復誰尸
中歲聞大道鍊已成蹉跎去日一以多來日今若何

六言絕句

洞霄

白鶴久辭華表青牛已度函關五內天花未飽麻鞋踏
盡名山

七言絕句

題邵二泉繡嶺草堂二首

湘山寂寂楚猿啼
湘水迢迢過客悲
何處管簫不愁思
邵公惠麓武公淇

茶仙品泉泉為寒
泉翁愛泉泉出山
只欲逃名逃不得
許多甘冽在人間

登北固樓

北固樓前鵝鵲風
奔濤蹴汝撼龍宮
舟楫是非京口渡
關河憂患海陵烽

遊焦山

焦丘龍臥浪冥冥
瓜步雲回海樹青
風塵重問焦光洞
讀罷華陽瘞鶴銘

武夷曲次晦翁棹歌十首

幔亭彩幄會仙靈
紫霧濛濛薄太清
奏罷人間可哀曲
鳳笙龍管杳無聲

沙棠為楫桂為船
紫嶂丹崖錦映川
我是開元李居士
鐵龍吹散萬峰煙

不道巫陽十二峰
玉環珠珮淨雲容
美人婉婉秋波立

迥隔天關百二重

藏裏黃棺壑上船春風秋雨自年年覺來天地終歸盡
煉得丹成亦可憐

蛻骨藏真傳此巖土花石黛已繆繆那能縣綆探金樁
下擣龍宮萬仞潭

大隱屏前煙水深九霄雲覆紫芝林彤墀不作含香夢
丹洞忻傳出世心

水過蒼屏灣對灣山形密似百年關巨鼇不戴東溟去

要與乾坤作大閑

博羅東下三百灘
噴雪奔雷仰面看
虬龍不出蝮蛇出
天風下來吹歲寒

石鼓雲樓天漢開
飛泉幾道白龍迴
探元笑入桃源路
黃葉千巖風雨來

九溪歷盡興脩然
亂瀑喧豗赴錦川
尋源已到明河曲
飛鳥還過一字天

金陵

紫禁金門閉寂寥不聞清樂下丹霄
高皇事業如天地過客何須話六朝

臥

黃帽青鞋何處尋道人高臥南山陰
閒誦維摩一百偈白雪牀前三尺深

竹枝詞二首

西澗西邊東澗東千山不斷萬山通
謝豹見春啼出血王孫上樹捷如風

金華四庫全書
卷八
梨嶺遙於楓嶺遙小關高比大關高傭夫過嶺如平地
一歲來迴二百遭

送林仲穎赴馬平

東浮淮海三千丈南過羅浮四百峰知爾欲尋勾漏令
會看雞犬白雲中

送陳侍御使廣

嶺南巨海散溟濛海上羅浮四百峰炎瘴直須三尺雪
鯉魚先避五花驄

權歌四首

鴻鴈飛來風雪心
鴻鴈飛去天山陰
二月天山風雪淺
六月天山風雪深

鴻鴈飛去稻梁荒
白鷗不飛羽毛傷
天寒日暮黃蘆蕩
江水渺茫心渺茫

送君把君綠荷衣
悲莫悲兮生別離
衢陽向上江水絕
縱有鯉魚何處來

青螺江頭遊子吟
黃金臺上秋水深
風塵一別一萬里

美人駕車傷我心

南征二首

去年出師大冒山五千步騎凱歌還可憐今日山前月
又照漳南諸將壇

贛水西邊是賊壕年年楚越泣弓刀天戈指處攬槍落
來歲徐看破爾曹

望靈山

上饒縣北香爐西暮靄朝煙咫尺迷平望靈山一百里

高南峰影入沙溪

天姥行

天姥旁通天一門下臨絕壑桃花源玉珮靈車杳然去
鳳笙吹斷越山魂

赤城懷太白山人

天台歲月輕劉阮不見雲端雙玉簫知爾西湖臥風雪
神遊先到石梁橋

昔余夢遊鴈宕乘最高臺東觀海波浩蕩回望萬

峯蔚蔚雲際及登盤山歷歷如在夢中竦然題句
昔年夢上百尋臺薄海鯨波天地迴四十九盤東向立
鴈山猶是夢中來

羽獵謠三首

君王自擁鸛鶴裘獵騎翩翩盡貴遊歸來錫宴傳封拜
狗監雞坊十二侯

羽林十萬是親軍漁陽鐵騎天下聞廐馬長留太白壘
胡天驚散犬羊羣

今年天子又行邊
勅報旄頭照酒泉
乘輿自領驃姚部
內使宣頒九府錢

送人遊吳興二首

黃龍洞下雲色深
雪水苔溪吏隱心
東道若逢孫處士
青春須寄峴山吟

鳩茲城邊望不稀
翠木朱藤罨畫溪
津吏揚舠唱歌去
溪花十里使人迷

天姥吟

山人住在天姥陰憶余曾登天姥岑雲樓雪磴參差起
下控桃源幾許深

燕京三首

將軍白馬紫金韉接鞢聯綏御座前並誇異姓稱皇孽
不用長纓係真犍

緋衣紫甲入東華羯鼓鐃歌散御花邊士盡騎天廐馬
燕姬翻泣五雲車

山後干戈震朔州君王按劍到邊頭二月凱歌班士馬

天閑遺却萬驂騑

送客二首送劉伯儒侍御

黃衫白馬簇金臺
送客飄飄去不回
莫向猿聲墮清淚
銅環椎髻解憐才

尉陀城外汎雲槎
西望峨眉隔水華
若道日南天萬里
歸心一夜過三巴

山人

稅鶴停鸞去不分
玉簫瑤瑟散春雲
日暮天花吹建水

曾孫重拜武夷君

新製白氎巾贈崑崙山人二首

細葛新裁白氎巾
風塵把贈武陵人
漁樵早晚相攜去
五色瑤花好自紉

萬里黃河天漢通
崑崙遙帶碧琳宮
青牛已度流沙去
述作虛傳河上公

曹仲禮索巾云將歸具茨兼柬王稚欽

元是山人白接羅
雲遙贈女莫相疑
便從夢澤穿高少

更歷襄城問具茨

送林茂貞大理二首

君今執法白門西，余亦將隨倦鳥棲。
黃籙為冠芟為服，幾時停棹武夷溪。

武夷溪上水濺濺，東入滄溟天漢連。
萬里裹糧從汝去，乘槎直到女牛邊。

正德十四年四首

君王按劍東南征，錦障黃旗出鳳城。
矯矯六飛熊虎士，

中原萬里倚戈行

雲中鐵騎獵漁陽
鼙鼓填填夜未央
白馬將軍傳號令
金盤寶篋進壺漿

黃牌使者出行營
選舞徵歌傾衛城
報道儒生飭士馬
南州叛賊一時平

桑黃渺渺躡飛塵
清路人傳天子真
宰相無須保車駕
至尊雄武動如神

送人之鬱林二首

蒼梧之峰雲萬盤下控牂牁連百蠻莫道蠻方非近地
日南南是漢關山

鬱林東下對扶桑黑霧沉山日暈黃鸝啼上桄榔樹
一寸鄉心萬里長

蜀中歌五首

巴東春水錦江來流入荆吳萬里迴樓船細逐江流去
不見瞿塘滌瀨堆

峽猿啼過下牢關雪嶺連天三百盤錦官城外西遊客

白日高歌行路難

連雲不斷三危路雄略猶殘八陣圖
巫峽劍門天地險

錦官白帝霸王都

灤東灤西花映渠浣花草堂今有無
苦憶平生杜陵老
暮年涕淚滿江湖

文園尚憶馬相如錦水風雲逐駟車
若道君王慕封禪
西京元有茂陵書

送人之嶺南二首

蠻江春色接瑤京江岸桃花流水聲他日雙鳬來謁帝
蓬萊宮畔笑相迎

潮州東門鱷徙溪行路蕭蕭猿抗啼可耐曩時勾漏令
雲車更度鬱林西

巴人曲

蛾眉山色上青霄白帝祠西巴路遙二月巴江花爛熳
一聲羌笛為停橈

寄安公石黃門二首

聞君久住成都市，豈為成都賣卜錢。
萬里橋西逢蜀使，問余何事女牛邊。

草玄亭下浣花溪，載酒看花隨杖藜。
青春不斷黃牛峽，日日思君猿猱啼。

送人下第歸蜀

黃金臺上草已無，錦官城西花映渠。
知君賣卜成都去，不羨風雲駟馬車。

南望湖二首

南望諸湖波映空
揚舲東逐芰荷風
垂楊亂覆茅簷綠
好看魚梁山照中

湖上空波明綵霞
逢逢花鼓若為撾
雲帆擬挾飛仙去
滄海驚傳銀漢槎

黃河二首

五月黃河風不迴
六鰲東湧雪山來
烏檣天轉蛟龍窟
未道瞿塘滌瀨堆

桃源縣前雷雨急
洪河拍天黃霧深
淮南古意正愁目

更着悲歌亂客心

瑯州歌五章

青氈烏帽適天涯
白首投荒莫咄嗟
東傍扶桑多意氣
南過勾漏有丹砂

長鯨一湧雪山翻
海若爰居不可馴
知君定怕風濤急
白地風濤怕殺人

君家住近海門潮
君去朱厓不寂寥
哨哨罔兩能人語
種種烏蠻解漢謠

蠻子灘頭興不孤
枕榔樹下打娘媧
年年五月荔枝熟
翻怪先生愛索居

嶺表黎酋分鳥羣
桂林象郡總能文
更憐蜃氣朝朝見
莫厭猿聲夜夜聞

夢黃山梅花

陽湖春動蕊珠宮
我夢黃山白鶴峰
羅浮仙子娟娟下
笑整雲裳風雪中

同王方湖泛舟鑑湖入蘭亭偶成贈章二首

木落泰山近草堂
避人仍葺薜蘿牆
知爾經綸數在手
釣船長繫鑑湖傍

鑑湖放船雲霧光
蘭亭八月溪水長
我愛風流王逸少
青山同引碧霞觴

若耶溪

山迴水曲若耶溪
八月荷花光映堤
越女勞歌采蓮曲
江南今有杜鵑啼

剡溪

曹娥江接剡溪流亂石幽花只漫愁剡曲尚疑安道宅
山陰誰上子猷舟

東山東董文玉諭德

東山中峰天漢連紫節丹屐共雲煙高臥正懷謝太傅
莫令小草後人傳

清風嶺

磽浦橋東雲壓山清風嶺矗明河灣捫崖忽漫雙流淚
日短風塵易滿關

天姥峰

天姥峻嶒不可招雲巖雪壑傍丹霄天台四萬八千丈
俯看飛虹度石橋

答天彝

君今笑入天台山余亦欲田箕穎間白日風傳紫芝曲
莫教人識是商顏

看花

山藤花開紅映衣看山藉草遲遲歸錦石無人溪水下

隔花刺船鷓鴣飛

天台雜詩四首

一夜雨聲吹不斷
國清寺前溪水鳴
欲過天台拾瑤草
秋風無限石梁情

赤城雲閉玉真符
桐栢宮涵滄海珠
早晚移家葛洪井
瑤臺雙闕是仙都

華頂數峰飛刺天
長風白日灑雲煙
鹿裘行探金明草
笑拍洪崖星漢邊

曇花亭前雷雨飛
石梁天巧眼中稀
素裾綦履沾雲濕
我自天台華頂歸

江村

錢塘江浪拍天來
江上茅堂負郭開
蜃樓鼉鼓時能見
鷗鷺鷗鷺晚自迴

青堊堂成二首

飄風落木氣蕭蕭
抱病經時亦自聊
湖上小堂馴燕雀
年來淨業混漁樵

子真谷口成深隱，少谷柴門故自開。
藥裏書籤蒙不理，海鷗江鶴日相迴。

遊淘江贈林樗翁

野亭雜花紅近人，山翁愛客青綸巾。
涉江欲採芙蓉去，無數秋風鬢髮新。

戲作木虛據石圖

雲裏孤峰爾獨憑，下觀星斗帶滄溟。
翻身笑折三花樹，擬傍蓬萊頂上行。

送克相侍御使齊魯五首

千盤岱嶽矗琳宮萬壑平吹瀚海風何能一探金鵝藥
並瀾呼雲日觀峰

溜青南下滄溟開鵬擊鯨翻天漢迴東巡定上蓬萊閣
五色樓臺萬寶堆

吾憐白浦控滄洲目盡雲槎天際流僮遇阜鄉雙玉鳥
與君高結望洋樓

海內談詩王秉衡春風坐遍魯諸生我昔傳聞薛吏部

為君遙式洛陽城

橋李忻逢孟望之
湖邊秋艇把楊枝
青袍笑入襄陽社
白璧翻傳梁甫詞

送人之萊蕪

萊蕪縣在海東頭
遷轉還君山水州
日日鳴琴了公事
魚龍波浪眼中遊

贈武夷道士二首

幔亭道士住紫宮
年過八十氣吐虹
揖余解下雙龍劍

指點雲涯三百峰

武夷亂峰攢紫蓮丹房想在彩雲邊分君一粟庖羲洞
間弄明河抱月眠

漫興

忽驚溪虎連羣嘯不分林鷗朝暮啼畫省行臺堪牧馬
山城更鼓不隨雞

觀馬清癡所臨元繆佚山涇雜樹詩畫戲為題句

吳下風流盡此物後來好事更傳真爾輩安身是何處

素毫零落寄丰神

塗山

泮水東行滄海迴
衣冠玉帛萬方來
後期獨有防風氏
君看塗山戮將臺

禹穴

脫屣行探禹穴靈
萬年鴻寶秘丹扃
梅梁寔石空山裏
想見虞廷舊典刑

曹娥廟

東闕東偏曹娥碑今古流傳絕妙詞洪濤駭浪翻滄海
要識人間孝女祠

桃源

桃源紅映赤城霞洞口春開度索花擬傍東方啖桃實
不隨劉阮問胡麻

石梁寄會稽王山人

石梁跨海與天通千里騎驢識孟公東路寄書王子晉
遲爾緱山緱氏峰

委羽

東海龜茲仙聖居琅玕芝草洞天虛函關已斷青牛駕
委羽忻逢白鹿車

有背師者索題東臯書屋

東臯書屋傍風雲翠篠紅蕖臥典墳請君終學壺丘子
汧水鯢桓恐未聞

至日

玄冥久不行冬令瘴霧蠻烟泥殺人惡草翻翻長至日

未看蘭蕙轉陽春

次素翁臨滄亭

滄海鯨波天漢長
壺公東影拂扶桑
彤雲彩霧行空壁
此是人間素老鄉

灘上

雪噴雷轟三百灘
臨川力擬障廻瀾
溟奔險過瞿塘峽
細看中流砥柱湍

吳門送黃明甫僉事赴嶺南二首

吳門海風吹白波
歲晏離城可奈何
明到羅浮避冰雪
還君及早播陽和

其二

江頭日暮歌欲罷
告訴不盡哀情多
嶺南自古炎蒸地
君去風霜合若何

惠山吟

去年曾飲中泠水
今日初嘗第二泉
我有靈泉甘比蜜
無名應是在山偏

延陵送劉克柔

延陵四月新水生
延陵江上送君行
行過長淮莫停耳
淮南淮北鷓鴣聲

玉山二絕

懷玉山前黃葉深
遠天烽火上人心
不知何處歌都護
拍斷尊前梁父吟

十月玉山寒雨生
萬峰疊疊更分明
長溪淺淑從容滿
冷蘂枯芳次第榮

畫者

近愛錢塘孫畫師江山花木亂生姿正愁京洛風塵急
却耐龐眉歌紫芝

赤城

天台山前黃鵠飛仙人城闕赤霞圍最憐謝女蓬萊去
未識人間馬子微

送沈一歸閩

烏石山傍思蕨薇還家頭白故人稀溟溟苦海沙棠棹

幾處風波他是非

瓠子河遇葉六

草草逢君瓠子河
河水漾漾柰君何
雲山涕淚渭城曲
天地爭迴易水歌

歌風臺

陸賈詩書叔孫禮
猶能潤色漢乾坤
爾曹未是真王佐
威鳳文鸞未得馴

大風之計在四方
豈意北晨禍蕭牆
身後貔貅盡食邑

左袒危乎伏彼蒼

寄黃明甫僉憲

頗憶故人黃小江為官三載帛書荒閩中幽事笑殺汝
麥飯藜羹辟荔裳

檳榔不過南詔驛五嶺冰霜今已多歲晏詩篇尚記不
吳門海風生白波

宿石門晦翁讀書處

石門挹被雲濕衣流水聒耳無是非海潮夜語梅花戍

起看扶桑朝日輝

籌峰南下楓林西
岩閣千盤平翠微
雲蹤不見朱夫子
尸祝能談劉布衣

悟道松

玉柱峰頭悟道松
根株歲久化為龍
若比茅山左紐檣
大千世界極鴻濛

遊丹青閣讀舊還懷許黃門啟衷

風流不見許黃門
文字丹青閣尚存
最憐佳句車盤驛

黃犢青山何處村

太山三絕

巨靈盤盤闔闔門日觀峰頭玉冊存黃峴西行看落日
碧霞南面拜元君

秦皇自謂功無量擬揭空碑古帝前磨崖小篆三千字
何似開元十四年

苦憶太山孫處士春秋三傳尚須編只今四海無青眼
欲向何門乞俸錢

讀漢書四絕

鄧禹數言天下計定功端合首雲臺牛鼎終非真會合
中興不復食鹽梅

子陵不廢桐江釣才力還堪比傅岩漢室規模故人意
只餘糠粃落空談

不及遼東管幼安龍翔鳳舉出人間東京竊笑三君輩
風節何裨末路難

建武閉關示無外後來夸者却開邊虎頭何物飛食肉

西山康居三十年

河道

金陵方物上樓船
州縣流傳則例錢
聖主戎衣無盜賊
山東河道避水鮮

龍湫

龍湫瀑流轉怒雷
回風散作靈霧飛
青雯倒掛鴻濛練
斷盡天孫雲錦機

沿溪見白蘋盛開

江深木落見蘋花
千澗秋容爾自佳
不隨穠李分春事
要接寒梅成歲華

天台

崩湍轉瀑下龍湫
晶晶銀河綵霧浮
履險能無伯昏分
等閒來往石梁遊

讀松江漁翁傳

垂釣松江三十年
漂身浴德意仙仙
那能心跡俱忘後
其女中流歌扣舷

呂徽之

平生意氣呂夫子遁迹空山薇蕨春不分弱小與強國
獨操魚釣寓經綸

元天台戍婦不知其姓名有殊色千戶長欲奪之
不可盜械其夫陣亡時守囚者頌其係且恤之至
意在婦也久且左其夫令聞之婦婦曰君以妾故
至此妾顧可負君耶遂棄兒女自投于百步石崖
下柴立湍激中死數日不仆當路聞者為釋其夫

因仍立石旌其烈石在紫陽神化之處今杳然莽莽也余過天台訪而吊之

台山名姝人共悲殺身千古怨娥眉不道激湍無獨立
析楊夫壻已全歸

贈族人栗齋侍御

露公之後世多賢侍御才名英妙年總見風霜上容色
更期搏擊向秋天

青野堂成二首

小隱堂開青壁上鵲鵲鸛鵒傍人初安身正學周夫子
庭草芊芊費剪除

不厭芳華耽寂寞江湖廊廟本同機明時正好興周道
要識莘磻是汝師

班玉杖歌二首贈木虛

阿羅掌上千年物信是蓬山綠玉枝拄到中天幹元氣
乾旋坤轉莫知誰

君家拄杖班龍質十二星精光恠多直教騰踏風雲去

王道平平奈爾何

至日

滄江病裏逢南至
化國欣看日線長
未堪取醉酬佳節
恐碍垂貂夢紫皇

江南氣候異京師
天道流行動失時
柳條梅蕊相催迸
蛺蝶黃鸝未入枝

贈樗翁

樗老釣磯淘水曲
漁竿獨抱弄滄波
經綸老手終自惜

置製鯨翻奈爾何

送平厓侍御使山東

爾往乘驄山海東
赤霞心捧大明宮
腰間繡斧橫金柄
白日青天意氣雄

鰲峰烏石殘芳迹
天府雲臺祗薄遊
堯舜山林余且隱
伊周事業汝須謀

孔林東奠龜蒙山
闕里長存天地間
要得吾儒振羽翼
迷方回首聖賢關

金定四石合言 卷八
八神長呵封禪文魚鳥能符七十君誰令先帝終巡幸
御帳親團龍虎軍

殷浩墳前烏夜啼飲牛那復魯門西我愧延陵吳季子
將無佩劍慰冥栖

金陵咏

金陵佳氣鬱崔嵬鍾阜龍蟠陰殿開萬里山河陵闕脈
十年松柏棟梁材

皇皇嗣聖造乾坤靖難勛臣有特恩王魏多知權所重

夷齊解事喪其元

靖難相傳是佛緣浮屠九級答諸天琉璃力盡金銀帑
黎庶身塗十八年

閩粵猶傳湯大夫殘山振海定皇輿當年肘後懸金印
今日人間賣玉魚

鄱陽戰罷錄功臣赳赳中山第一人不識漢家同用武
雲臺顛倒序元勛

祀典春秋享帝王漢高祖豆有輝光皇王帝伯原功德

戰伐何如揖讓長

何嶺見杜鵑花

青龍白虎事非幻石室丹崖路不賒
一枕却成塵土夢碧山開盡杜鵑花

送人遊新安

送君南向婺星源三十二峰雲色連蒼龍
白鶴時來往羽蓋銀幢下九天

峴山

劉守新作去思碑劉元瑞為文撫時興懷漫為題句

吳興雪水水倒飛上
蘇下蘇歌正悲江漢有誰羊叔子
峴山先勒去思碑

蜀中歌

其六補

雲濤雪浪通牛渚
杳杳飛槎天漢行
芝殿並宮連棧起
成都今去問君平

山行見嬾椿

嬾椿一樹與松長
麗並秋揪紅翠香
愛爾未知誰更嬾
松間好看臥雲房

南征

貔貅南出晉安門
劍戟如霜萬馬奔
小醜應須就殄滅
天威南面正乾坤

君王南顧似深憂
每遣材官守贛州
多士能無見節義
諸公何意遁巢繇

將軍自許霍嫖姚
豺虎山南尚爾驕
有人伊昔持干羽
不出階除格有苗

官軍不出粵山深
招撫年年空費心
天子拊髀思葛亮

南中孟獲定成擒

縱使孫吳親戰陣何如仇覽在蒲亭鳴梟亦化為鸞鳳
農器寧銷作甲兵

贛州城頭鼓角哀清漳道上羽書來何處總戎深屬望
陽明夫子出羣材

旌旗莽莽亘紅雲鉦鼓逢逢警六軍壯士不圖收戰骨
五陵豪貴策奇勛

少谷集卷八